



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

*Komunikadu Imprensa*  
*17 Feveiru 2015*

## **Sestu Governu Konstitusionál tenke asegura independénsia judisiáriu no separasaun poder**

Ohin, 16 Feveiru 2015, Timor-Leste marka tan istoria foun ida iha prosesu hari'i no hametin soberania Estadu Timor Leste liuhosi serimonia simu pose ba Primeíru Ministru Sestu Governu Konstitusionál, Dr. Rua Maria Araújo ho ninia estrutura membru governu sira seluk. Serimonia simu pose ne'e prezide hosi Prezidente da Repúblika, Sr. Taur Matan Ruak, iha Palasio Nove-Lahane, Dili, Timor-Leste.

JSMP kongratula Primeíru Ministru foun ho niania estrutura tomak no enkoraza Primeíru Ministru atu restoura fali kredibilidade no independénsia setór judisiáriu. Setór judisiáriu durante ne'e iha dezafiu nia laran tanba hetan influensia no interreferensia hosi politiku sira no governu foun tenke fo fila fali kbi'it/poder ne'e ba tribunál sira atu ezerse sira nia funsaun ho livre. Tanba setór justisa nu'udar setór ida ne'ebé fundamental atu asegura governasaun diak no kombate prátika korupsaun.

JSMP haksolok teb-tebes atu hare Primeíru Ministru nia diskursu hahu enfaze ninia komitmentu no lealidade polítiku atu hakruuk ba ordem konstitusional, lei, separasaun poder no respeita ba orgaun soberania estadu sira seluk inklui orgaun judisiáriu.

JSMP fiar katak iha estadu demokrátiku ida nia laran, la iha orgaun soberania ida mak iha poder polítiku boot liu fali poder sira seluk, no tribunál nu'udar orgaun importante ne'ebé ema hotu tenke respeitu.

“Importante tebes ba tribunál sira atu hetan fali sira nia konfiansa no independensia tuir Konstituisaun haruka no atu asegura katak interferensia ba setór justisa no violasaun ba prinsipiu separasaun ba poder nunca bele eziste iha estadu demokrátika ida nian laran,” dehan Luis de Oliveira Sampaio, Diretór Ezekutivu JSMP.

JSMP enkoraza Sestu Governu Konstitusional atu halo esforsu hotu ne'ebé posivel no explora opsaun alternativu seluk hodi tulun setór justisa. Governu persiza investe liutan rekursu umanus iha tribunál sira liuhosi reforsa Centru Formasaun Judisiáriu, fornese kondisaun servisu ba setór

justisa, fo seguransa ba tribunál, implementa Lei Protesaun ba Testemuña, altera provizaun Kódigu Penal aktual atu proteze diak fetu no labarik sira ne'ebé afetadu hosi violénsia seksuál, abuzu seksuál no inestu no forma krme violénsia bazeia ba jéneru sira seluk no fo kbi'it ba tribunál atu julga kazu korupsaun sira.

JSMP fiar katak Sestu Governu Konstitusionál ne'ebé hetan fiar durante tinan rua ba oin sei halo buat hotu tuir normas no prinsipiu sira ne'ebé hatu'ur ona iha Konstituisaun hodi restoura fali instituisaun demokrátiku sira no partikularmente hadia fali konfiansa publik ba setár judisiáriu no hadia fali Timor-Leste nia naran diak iha comunidade internasionál.

Atu hetan informasaun kompleitu bele kontaktu:

Luis de Oliveira Sampaio  
Diretór Eksekutif JSMP  
Alamat e-mail: [luis@jsmp.minihub.org](mailto:luis@jsmp.minihub.org)  
[info@jsmp.minihub.org](mailto:info@jsmp.minihub.org)  
Telefone:3323883 | 77295795